

四庫全書

集部

欽定四庫全書

集部

攜李詩繫卷三十五至
七

詳校官侍講臣王燕緒

主事銜臣徐以坤覆勘

總校官進士臣朱鈴

校對官學正臣翁樹棠

謄錄監生臣謝滋琬

欽定四庫全書

樵李詩繫卷三十五

平湖沈季友編

國朝

閨塾師黃媛介

媛介字皆令秀水人文學象三之妹與姊媛貞俱
擅麗才而媛介尤有聲香奩間書法鍾玉人以衛
夫人目之畫亦點染有致適楊元勳夫婦偕遊江

湖為閨塾師以終有湖上草王端淑曰皆令倚馬
自命落紙如烟摘其佳篇蒼然秀勁會稽商夫人
景蘭贈之詩云門鎖蓬蒿十載居何期千里覲雲
裾才華直接班姬後風雅平欺左氏餘八體臨池
爭幼婦千言作賦擬相如今朝把臂憐同調始信
當年女校書王端淑有寄皆令梅花樓詩云買舫
急欲探先春風雪偏羈病裏身聞有梅花供色笑
客途如爾未全貧凍筆塗殘半是鴉剡溪渺渺竟

迷槎相逢只恐梅花笑惟我春來不憶家嘗自作
離隱歌序云予產自清門歸于素士兄姊雅好文
墨自少慕之遭時多艱萍蹤無定轉徙吳閭羈遊
白下後入金沙閉跡牆東雖衣食取資于翰墨而
聲影未出于衡門古有朝隱市隱漁隱樵隱予殆
以離索之懷成其肥遯之志焉將還省母爰作長
歌題曰離隱歸示家兄或者無曹妹續史之才庶
幾免蔡琰居身之玷云爾吳梅邨製駕湖閨詠四

章贈之詞見本集

鴛鴦湖

輕風貼水飛春燕佳人宛自簾中見
向水闌杆處處園
梅花草葉春香變昨夜雲晴日影孤
中洲曲沼生新蘆
嘉興風景知何處亂帆烟柳鴛鴦湖

閨園詩為豫章李太虛先生賦四首

堂築脩陂外常來書畫船入春花照地不夜水連天香
發聞芳杜鴻飛識渚田林居知氣候無事此高眠

居近神仙里丹經早自知
堂成初似畫世變已如棋
湓浦雲歸晚廬峰鳥下遲
依依天際想去住是前期

禹穴探奇歲擣毫賦兩京
坐嫌天地窄行覺水雲輕
鐘遠虛聲應林幽夕照生
十年耽異致蓬閬豈虛名

境逐滄桑換身同詩卷留
望雲生絕壑見月老寒湫
道在心無染名高世是求
聊將少君隱共賦鹿門遊

同祁夫人商媚生祁修媽
湘君張楚纓朱趙壁

遊寓山分韻二首

名園多異植花遠曲闌邊山抱蒼潭水林藏碧樹烟
栖烏啼月下迴棹泊霜前酒罷同歸閣開奩納翠鈿
佳園饒逸趣遠客一登臺薜老蒼烟靜風高落木哀
看山空翠溼寬路亂雲開欲和金閨句慙非兔苑才

旅中秋日

憂危只有客心微贏得湖光蔽竹扉囊有新詩聊寄賞
家存舊壁亦懷歸青山斷處饒紅葉黃菊開時少白衣
近水陰晴容易過忽驚風雨打窗飛

南湖竹枝詞三首

胭脂點罷拂雙蛾
喚整衣裳厭麝多
爭向水邊呼不住
弄鉤潛自拗輕荷

倚屏點拂晚粧濃
膩粉中間映淡紅
墮髻不粧閒首飾
鳳釵斜插玉玲瓏

嘉興美女慣濃粧
絕樣南珠間翠璫
廣袖繡完裁四帛
外頭單罩紫綃裳

湖上

西子湖頭千頃春風光不屬去來人朝嵐夕靄誰收得
半在憑闌半釣綸

秋夜懷月輝孫夫人

肅肅秋聲滿院聞晚風吹盡一天雲滿階落葉蛩鳴後
好月當空疑是君

黃媛貞

媛貞字皆德媛介之姊太守朱茂時側室王端淑
曾稱其詩律清警

初秋

草木疎疎綠未乾，飄風日夕動林端。
拈將針線寧心就，理得音徽不暇彈。
曉起簾櫳初退暑，晚來樓閣又生寒。
衣輕扇冷無餘事，好向窓前借月看。

悼亡兒六郎

霜飄鴛瓦重月上，燕梁遲最是消魂處。
明珠去掌時

立夏日寄懷兄妹

一夕南風動鶯啼，綠盡知愁深梅子候。
約過杏花時已

負高春話無華新夏期三山天月裏各有一人思

弔鶴詩

素魄飄然上白雲松風寂寂竹深深月移誤識來時影
花落當知去日心錦帳美人思妙舞別峰高士枕空音
碧霄孤冷尋何處日夕閒看水木陰

立秋日夢分得成字

窓前脩竹洗來清且理琴書託此生涼到半庭分夏去
夢將一字許秋成凌虛久接梧桐影孤坐新驚砧杵聲

我意正悲時節易更教重論月中情

孫蘭媛

蘭媛字介晚德貞長女適同邑文學陸渭工詩詞
多韻語不雜脂粉擅寫蘭竹著有研香閣詩王端
淑曰介晚詩如行雲流水在有意無意間

讀外君登岱詩

會勒先姑沈安人石
幢于泰山歌馬厓

天下何曾小家鄉吳觀中卧遊詩一幃片石白雲封

秋汎

烟拖高柳蕩秋姿落照寒蟬故故悲放棹歸來月初上
風吹荷葉斷殘絲

雨夜聞梅香作

溼盡孤牕燭冷時梅花香破一枝枝逋翁未解黃昏雨
清淺閒臨照影池

孫蕙媛

蕙媛字靜婉德貞次女適桐鄉孝廉莊國英蚤寡
著有愁餘艸詞工小令與介婉爭勝

讀縫雲閣艸賦贈沈夫人次姊氏韻

綺疏高擷補天樓銀榜新題藻靄流月姊靜窺三素粲
風姨不卷五華柔寓情妙句針同聖隱意迴文錦可酌
組練自知從研北絲絲葉葉幾殘篝

沈孺人榛

榛字伯虔嘉善麟溪人天啟乙丑進士南昌府推
官沈德滋女適進士錢黯

紅白瓶梅

不盡南枝放軍持入畫裝
繡英矜白雪疎蕊點紅粧
羃歷難分影蕭森共一香
妬風應莫慮春色喜先藏

家園古藤花

園有九松
勝國時植

循牆蜒蜿走龍蛇占盡家山首
夏花鬣鬣影隨華髮動
累累香貫藥珠斜窺園乍對疑
朝彩隔檻遙看悞晚霞
折得一枝持叩問藤年還似九松耶

顧娟娟

娟娟嘉興妓

贈別

南國相思子西番篤耨香留君克離佩休賭紫羅囊

行剛

行剛號祇園嘉興人處士胡日華女嫁諸生常公
振未期而寡中歲出家為僧通乘弟子住嘉興梅
會里伏獅院有語錄

孟夏關中詠

百結鶉衣倒挂肩饑來喫飯倦時眠蒲團穩坐渾忘世

一任塵中歲月遷

沈栗

栗字仲恂榛之妹諸生陳誼臣室

紅白餅梅

曉避狂風落宵隨竹影斜
朱顏羞剪彩玉骨絕含瑕
漫簇參差蘂同分濃淡花
羅浮夢何許一為膽瓶誇

王煒

煒字功史又字辰若太倉人太原相國之裔海鹽

陳文學光緯室能詩善畫有燕譽樓稿與卞夫人
為師弟交得其清秀蒼韻之傳有林下風以世亂
偕隱于婁博學敦古詩多名句顧伊人稱為笄幃
中道學宿儒不當以香奩目之如月光臨水淨雲
氣近山多開簾納新燕移榻近高柯皆佳句也太
倉女子黃若從父蜀歸以奇花珍木圖示之日夕
模寫致病而歿

題介琬陸夫人畫竹卷

自昔管仲姬抽毫染修竹娟娟綺石傍琅玕照人目猶
屬閨閣才胸中少林麓只今介畹氏潑墨較純熟生綃
百尺強渭川千畝簇初苞間枯梢暮雨秋烟綠筆牀螺
黛殷玲瓏戛寒玉潜招湘女魂碧窓伴幽獨

和吳巖子師湖上詠

柳色六橋迷晴雲萬山吐燕帶落花飛鶯隨歌管度倚
樹聽提壺疏泉成瀑布小閣遇春陰松聲嘗似雨

冬日林居

颯颯微風雪長林鎖白雲
曳蘿山骨迥汲澗水衣分樹
老花猶在霜清雁不羣
誰憐搗衣者此夕幾回聞

夏日

幽居感地僻清曠絕塵喧
刪竹蜘蛛墮釣魚翡翠翻
課童親稼穡宴客治蘋蘩
唯願垂楊樹清陰掩我門

春日閒居

南郊春色滿人靜鳥聲多久
雨魚苗活微風燕子過花
飛寒食節草綠夕陽坡盡日
無他事援琴對薜蘿

感懷二首

遠離阿母四年餘百疊愁眉更不舒
眷戀庭闈惟有夢
播遷南北未成家園風景三更月
夫壻生涯數卷書
無限傷心歸未得
鸛鵲典酒對相如

空傳錦字有才名
淚雨春來似未晴
倭墮睡殘悲數病
度度炊盡送遐征
心隨吳水鄉關去
愁逐春雲晝夜生
潦倒三遷名未就
誰憐女子賦離情

同諸太母登浮圖

同登化塔縱遊觀山色蒼茫海色寒風送珮聲臨絕頂
日將人影上危闌諸天直向雲中接下界翻如畫裏看
到此須知塵相幻凌空誰敢更盤桓

送文如師氏歸里

寒林小鳥尚嚶嚶獨向東城為送行思逐回風悲落葉
夢驚流水作寒聲高齋有意還遲月短棹無心復計程
分手淚傾南北恨孤帆杳杳夕陽橫

酬徐姊鄭夫人

已知彤管寄情賒金縷珊珊改絳紗
隱几尚傳康伯母下帷猶似謝公家
桃笙乍轉湘波動灌樹初殷海燕斜
翡翠筆牀空作賦輸君相贈有瓊華

上巳分韻

解襖迴流蘸遠峰香車碾破綠蒙茸
三眠柳下紅牙按四照花邊錦帳重
連騎自從金谷遇泛觴疑得酒泉封
遙知列燭揮銀管漏短春深不似冬

西泠閒咏

澄江迴抱古城斜一片煙雲接永嘉為愛好山聊住足
偶依高樹便成家湖光潋灩侵行笈竹影參差帶落花
聞道故人將卜隱短衣雙挽鹿門車

宮詞

宮漏沉沉緩箭流行雲不下殿西頭平明試卷珠簾看
陣陣飛紅入御溝

洞庭道人趙昭

昭字子惠吳郡寒山隱君女祖母陸卿子母文端

容俱擅詞翰之席子惠能嗣其美適平湖文學馬
仲子班性好煙霞嘗葛衫椎髻自擬道民仲子強
之不克會仲子父難破家子惠遂入空門更號德
隱結庵于洞庭西山中香林匿影二十餘年亦吳
越間一奇女子也有侶雲居遺藁

新秋晚眺

山中多晚涼清風厲秋節遙瞻四五峰壁立皆奇絕修
竹傍林開喬松倚巖列黃菊散芳叢清泉凝白雪對此

懷素心千里共明月願保幽貞姿歲寒雙皎潔

雨中得家信寄荅

寂寂空庭雨始自東南隅飛鳥銜書來徘徊顧我廬故
巢今尚在新燕誰與居願子念幽獨中道盼迴車我心
固匪石君意今何如

種竹歌

南山南北山北其中有竹人不識托根數莖臨嚴霜虛
心願並幽溪柏秋深草木零落盡此竹亭亭終不易

贈琴如閔夫人

曉日下粧閣春風動繡幃侍兒調百舌夫婿畫雙眉舊
製芳蘭佩新裁粉荔詩柳花初入咏撫景步遲遲

冬日感懷

獨坐淚沾衣天涯信未歸幽琴鳴轉寂孤梗斷何依越
水雲俱冷吳山雁不飛空庭杉影亂喚婢掩柴扉

春日泣懷先慈

蘭闥儀範廿年餘德耀神葩玉不如坐帳每教吟五字

遣盜親自繪雙魚最憐辛苦懷蘭佩猶憶提攜載鹿車
風木有情腸欲斷夢中空自學牽裾

當湖文園聞已填茂草慰外君

遙望殘陽落故墟更傳烽火遍州閭綠沉渭畝臨溪竹
香散文園滿架書釣艇蒼茫浮少伯琴臺寂寞憶相如
多君腹笥依然在詞賦翩翩好似初

祀寒山先墓

一天風雨倍傷離回首寒泉曲澗西伯道祠邊猿獨啖

中郎墓上烏空嘯塵飛臺閣書還在雪壓松筠鶴自棲
從此素絲憑世染漫憐志與白雲齊

乙酉孟秋兵亂

登高望長水水長人未歸遙憐弄珠女不學九疑妃

皆令黃夫人過寓山閨即事

吟得新詩子夜殘銀缸點點照花欄
湏臾小婢來相報
深竹烏嘯月滿灘

早春次端文舅父韻

山中久雨春將半樓外啼鶯日已斜
攜尊自向蒼苔坐
為惜枝頭殘杏花

洞庭一粟菴咏梅

玉女茅庵白布袍
珊珊仙骨道風高
幽情未種曇花樹
先插江梅映白毫

美人

眉鎖春山鬢點鴉
莫將桃李鬪芳華
無心去逐風流隊
閒向雕闌數落花

水蟾子吳朏

朏號水蟾子華亭人適嘉善曹允明王端淑曰詩
多古意矯矯如千丈松

艷曲二首

金屋暖長春蘭堦人似月但願如月圓不願如月缺
贈妾紫金環遺郎白玉玦郎恩環不解妾心玉比潔

採蓮曲

弱柳繫遊驄叢花映嬌面郎珮紫紋囊儂從扇底見

鄒姬蓮午

蓮午嘉善人進士丁彥妾其繼妻吳中燕不能容
入空門焚修

即事

初裁白袷立梧庭瘦骨徒憐病葉零酒後紅酥猶帶冷
三三五五見疎星

彭琬

琬字玉映海鹽人進士期生妹浙江總兵馬孟驊

媳與妹琰稱雙璧王端淑曰琬詩巧慧俊冷不作
淺浮小語

懷王辰若夫人

湖上烟生碧樹枝柴扉晝掩落花時何當得覩雙文貌
堪羨擎來道蘊詩曲逕茶香留夜月朱欄鳥下看圍棋
三春風雨愁深淺病骨支離無限思

彭琰

琰字幼玉琬妹適文學朱化鵬詩不多見而名句

絡繹王端淑稱其才情兩足似勝姊氏姊惟幽艷
妹則英特而博大矣

懷王辰若夫人

碧艸萋迷接柳枝
匆匆良晤夕陽時
纖眉畫就春山色
素紙裁成白雪詩
風送花香沾去袂
烏啼竹徑冷殘棋
歸來靜掩閒庭月
欲向清光寄所思

病春

半簾垂柳夕陽斜
香冷閒窓日更賒
莫道朝來不憔悴

撩人偏恨牡丹花

周慧貞

慧貞字挹芳吳江人嘉興孝廉黃婷之室早歿沈
宛君為之作傳王端淑曰挹芳與孟畹柔嘉鼎足
三分為一時之勝

七夕

雙星暗度巧雲飛玉漏聲殘月正西秋思不堪傷獨立
數竿風竹小窓低

王氏

王氏嘉興人王端淑曰鬆雋不凡可與言詩

春日

晝長門靜掩愁病自應憐倦繡頻餘錦焚香數熱錢護
花嫵蜨舞聞柳愛鶯眠偶到樓頭望春光半已還

王湘貞

湘貞嘉興兵部侍郎張天植之妾張被逮王同衆
妾史蘭若章蘓淑裂帛作小楷寄張以死今存王

詩一首

臨終詩

自入君門卅幾年
今朝賁志下黃泉
倘然女侶相呼問
同是前生未了緣

顏畹思

畹思字宛在桐鄉人
王端淑曰蒼老靈異識度弘
遠洗去近日蹊逕

題牆上薔薇

小院陰陰晝漸長一枝掩映似窺牆
窻籠白日分紅艷
葉鎖輕煙漾碧光
半面偶憐香自遠
全身何處影能藏
誰家錦帳遮春住
莫放東風逐路傍

顏佩芳

佩芳字芳在桐鄉人王端淑曰一氣雄壯出人意
外而靈警之句滿幅

孝嘉姪過予併詒以詩同和

年來踪跡各西東乍見翻疑是夢中
愧我能裁謝氏絮

喜君不墮庾家風千秋事業還憑立數載離情得暫同
正沸爐聲歸棹促一番聚散苦匆匆

袁瑞英

瑞英字素如嘉興人見西湖唱和詩

集傳園

傷心不敢上高樓滿目關山使妾愁腸斷意中人去後
鴟絃斜整淚先流

宋娟

娟杭州人以亂被掠至清風店題詩于壁後歸嘉
善曹太史王端淑曰哀憤似蔡琰而情思纏綿

題清風店

妾命如朔風飄然振落葉不入郎羅幃乃逐塵沙陌妾
本良家兒流落平康劫十三工秦箏十五好筆墨武林
遇公子知心不徒悅忽爾天地崩干戈作長別朔雪戰
寒風皴肌冷如鐵誰謂文姬哀猶得過漢闕誰謂明妃
怨猶能封馬鬣而我薄命妾終當染鋒血胡不即就死

心為公子結公子爾多情豈忘西湖月公子爾多智豈
不諒我節公子爾任俠忍妾委虎穴公子爾多交交豈
無豪傑媒妁扇上詩顛沛不忍撇忍死一相待悲酸難
再說又聞洞山方風流當世杰爾既善顧即何不一救
妾

徐簡

簡字文漪嘉興人新安吳子庭副室吳遊粵留文
漪於吳門或曰後歸楊中翰著有香夢居集王端

淑曰其詩輕清宛轉無一率筆

和元微之生春詩

何處生春早春生錦幔中
香吹金篆火夢警玉鈎風
綠髻堆鬟膩紅酥壓酒融
小窓遐日照花影隔紗叢

宮詞三首

看春偶立幔亭東
天語呼名內殿中
敕與司香薰雀尾
御衣旋覆象牙籠

紅樓昨夜醉春懷
玉導當場勝賭牌
却被簾鉤輕觸損

聖恩重賜九鸞釵

沉香亭子玉勾欄
植遍名花按月看
第一莫栽紅芍藥
此花開日又春殘

吳氏

吳氏嘉興人銓部某之女才色俱絕以所配非偶
不自檢束致訟後流寓金陵

舟中

一泓秋水浸羅衣
月色依舟淚滿幃
皓魄不隨風落去

空留怨骨伴郎歸

吳芳

吳芳秀水人吏部吳竹亭女適同邑徐然然字撫辰

寄遠

東風吹就雨簾纖殘夜無言且獨眠
翠髻未偏羅帳冷
欲憑清夢到君邊

沈夫人珵

程字未男嘉善人順治己丑進士工部主事丁彥
元配彥妾鄒蓮午亦能詩相繼早沒繼娶吳中燕
嘉興人頗解文義性高寒放跡山水以終王端淑
謂程詩刻畫入情處直令物無遁形雖少陵復起
不能過也

即事二首

山萼紛紛出槿紅月窓有句向文同
鴛鴦錦下支機石
可是相如軫上逢

睡起春慵拂曉颺攪人幽夢是黃鸝一竿犢鼻隨南阮
何事綿綿催畫眉

錢涓

涓字襲文平湖人薛吏部振猷媳有抱雪吟一卷
自為序

山雨

晚結陰雲日不輝
霽霽雨透濕羅衣
窓前萬綠渾如洗
坐看蠻烟夾岫飛

虞美人歌

楚歌四面起項王兵敗兮項王敗矣虞何為死王劍兮
魂相隨長夢應憐歌舞宴月明從此照空帷堪嘆八千
子弟也終無一箇揮戈者玉顏飛血逐東風化作年年
淮艸紅入春常帶傷心雨至今猶自泣重瞳

施璲昭

璲昭廣文施鉉女平湖人適文學沈炳孚早年夭
卒有詩一卷未刻

獨坐見月

蕭蕭夜色涼
小院驚佳節
病骨不禁風
垂簾待秋月

春日送姊

分手河橋淚滿衣
渭城三唱落花飛
那堪堤畔無情柳
搖颺東風送客歸

秋日

颯颯悲風吹雁聲
竹窓寒月露華清
殘燈挑盡愁無寐
被冷香消漏四更

秋閨二首

滿院梧桐帶翠凋，竹窻疎雨濕芭蕉。
西風吹遍空閨冷，縷縷殘香尚未消。

雨過幽庭濕翠微，新涼初覺懶添衣。
慵拈針線悲秋咏，幾向西風怨落暉。

早梅

點點寒霜飄未盡，朝來忽見數枝開。
東皇豈解愁人意，先使庭梅報信來。

清明

懶捲珠簾看燕飛
愁魂化蝶香難依
清明情緒都蕭索
煬帝堤邊柳不肥

暮春囑病

感汝誤憐不見別
想因錯認作休文
如今但願隨春去
風舞楊花欲送君

馬福娥

福娥名家女
適禾人沈宏略
所居之室扁曰蘭齋

因以為號詩名斷釵集里人王庭俞汝言序之

喜雨

曉起日猶赤雲低雨驟來枯池重積水老石更生苔農
務多時苦天心此日回綠窻無一事蕉影亦悠哉

春霽偶成

微日初開涼氣清強扶病起怯徐行堦前嫩艸籠烟睡
簾外新花帶雨迎雲淡晴光浮碧綴風搖葉色半窻明
爐香茗汁時相得頻聽黃鸝樹底聲

暮春病起東姑母陸夫人

庭砌蕭疎細草勻韶華病起惜殘春
一籬菜暖粘花蛭幾片花飄上繡茵
少婦閨中粧似舊垂楊陌上綠還新
封侯自古良非易不厭詩書夫壻貧

人日病卧

晴光轉處盡知春多病依然此一身
塵世久知家是客年華又見日為人
愁看曲裏梅花落驚對庭前彩勝新
沉水香殘茶汁冷薄寒無那透重茵

春懷

日暖閒庭草色明，傷春綺閣伴茶鐙。
吹簫自作秦樓想，咏絮羞傳謝女名。
睡裏花香遲蝶夢，靜中窻紙聽蜂聲。
曰歸惆悵跂予望，却羨翩翩燕羽輕。

早春見梅

未辨探花屐，前窻曉忽開。
春風不相待，飛送暗香來。

中秋夜戲贈鄰女

桂子當天落，朱門對戶開。
容如春正好，人向月中來。

雪珠

乍聽披檐響俄驚遠砌圓明珠如有意留作掌中看

惜春

何處堪惆悵紅殘雨後春一雙衣袖濕知是折花人

漫興

風吹滿樹葉蕭蕭睡起珠簾影動搖却恠深閨天易晚

藥爐烟重濕芭蕉

雨髮道人陸觀蓮

觀蓮字少君別號雨鬢道人嘉善石輝里人也適
桐廬父山人丹生山人初居吳之專諸塔右後隱
震澤之西邨草屋蕭蕭烟火時絕惟與道人唱和
比舍聞歡笑聲則道人詩成山人擊節而歌林鳥
栖宿皆驚起子訥女默道人恒授書焉山人有詩
曰室中有高士十年樂飢虛又曰憐渠最幼小獻
歲解吟詩蓋自詡也復移住嘉興盛澤三年最後
以避水患隱嘉善蔣湖之西園亦三年康熙丁未

山人將攜家入九峰道人忽病而逝又三日女默
亦逝山人當秋風蕭瑟中夢女為言大人頃在舊
隱病兒日進湯藥又夢道人言我母女以好禮斗
持佛號蒙紫府收錄更名女曰瓊真與羣仙遊也
道人自集其近詩曰蔣湖寓園艸吳江顧有孝為
序而題之曰及氏閨隱集并附其女默之作焉

蔣湖寓園對月

并序

夫觀千劍者能劍觀千賦者能賦服習衆神豈不

然哉余少依姆師僅通章句長隨夫子遂曉詩篇
柳下栖遲未見薦禽之客隆中高卧誰為友葛之人
以是同梁生之出闕深慙德曜異少伯之辭越不
羨夷光長與蠹簡為親蕭條三徑獨向芸編為伴
離別經年兒既能文女亦識字厯冬夏以靡輟慣
饑寒而不啼既而游子來歸不殊師友之對時有
高人造訪實多贈答之辭稍知工拙之分畧窺正變之
則荏苒數載常如不繫之舟留滯他鄉盡是若浮

之梗昨因避水來止斯園門掩深邨對琅玕之个
个人歸遠浦汎雨雪之紛紛盼望故廬不逾衣帶言
旋舊里終隔山河落花與芳艸相依明月共清風
自舉顧此幼女夙慕古人如左氏之有芬才華挺
茂在荀家則為灌志畧英蕤朱粉不施自是蓬門
之質丹鉛能好居然林下之風以此消愁愁可知
矣嗟夫篇章耽玩詎為失意之悲兒女關情不作
無家之別況聞郝公築室植松桂以相招陶令卜

鄰樂晨夕而不返興言在邇益復牽懷簡棄舊篇
獨存新什豈徒誇謝庭咏絮蔡閣聞琴而已哉

青天挂明鏡輝光照我牀展轉不能寐起坐空徬徨
徬徨亦何為曰思我故鄉瓶齋舊隱處乃在蒿水陽廿年
幾播遷渺渺天一方回思手栽樹橘柚徒含芳安得生
羽翼摩天一翔翔

念沈氏老姊

昔聞恒山鳥四海各分飛念我同生子四女相因依辛

苦效反哺力盡心亦微仲姊久長逝淚落不可揮所遺
我三人戀母願空違伯也失所天忍死鞠孤兒年近
四十與婦同分離楚楚一孫女遣嫁時來歸上堂問祖
母終朝無苦飢嗟予季與叔相見時亦稀撫琴彈此曲
此曲聲殊悲

寶劍篇贈外

吁咄哉荊卿劍術既不成雖有寶劍徒空名千年黯黯
閉秋水雙匣渺渺埋龍精狐狸夜號風雨惡蛟螭晝舞

波濤驚我持此劍若明月衆星朗朗隨其行又持此劍
若白日羣妖退走橈槍平橈槍平衆星沒送君贈君君
莫惑古來遇合自有時神物出處當知之

辰山步虛詞

鬱蕭宴罷列仙歸彩鳳青鸞各自飛勅賜珍珠三百斛
滿身瓔珞遠天衣

焚香讀道書口占

紅窓花影自紛紛一卷常持冰雪文却憶夜深禮斗罷

彩雲遙送小茅君

墨姑父默

默字齋季小字墨姑嘉善父母生山人之女母曰
陸少君姑生而奇慧九歲能詩山人有元旦家集
聯句姑首唱焉山人好遊獨姑與母居詩益工凡
刺繡刀尺無不入妙習小楷摹畫李龍眠白描大
士年十六未字母死三日姑亦卒姑容貌端麗聲
影不出愛管夫人畫竹一幅與同卧起并玩好文

石子十許枚小白瓷罌二器凡零香斷墨殘繪刺
繡山人悉內之棺其自跋詩卷云默三歲飄零從
二親于外郡十年夢想思一返於故園蔣湖以避
水而來舊廬若望洋而止老母倚北堂而興嘆中
夜挾寶瑟以長吟非無慰藉之詞實多於邑之調
晨寔乍啓瑠璃之硯匣自隨夕幄徒薰翡翠之筆
牀不去以是長見笑於鄰女不解看花或貽誚於
閨人何知闔州情繇此遣緒以此深矣駕言當秋

攜家渡泖攬九峰之奇勝
髣髴金庭專一壑之幽閒
飄飄雲嶠精瓊廡而延佇
齊玉軼以上馳曰父曰兄
尋采藥之赤松旦暮可遇
為母為女盼傳書之青鳥
閨閣非遙爰奉命于慈闈
篇分甲乙冀流輝於彤管
字辨宮商庶幾染翰而成
不須石墨含毫以待有取
香茅

和母寶劒篇贈兄

牀頭夜半雙龍吼
光攝羣妖暗星斗
風雨霹靂一瞬間

木拔沙飛石亂走古來神物太平常遭時遇主生晶光
拂拭霜花將解贈時無烈士空徬徨空徬徨莫太息木
蘭唧唧當戶織阿兄少年射白額歸來摩挲看太白

憶震澤西邨

忽忽難忘處西邨明月中荷花低拂露菱葉靜含風烟
火經旬斷音書隔歲通茅堂知在否應有白雲封

辰山步虛詞

闔闔初開黃道邊鳴鐘伐鼓會羣仙多緣悞折瓊枝樹

謫下瑤臺十五年

彭孫靖

孫靖字嬰如海鹽人錦縣令陳龍孫配彭孫適姊
有盤城遊草

夜聞絃索

寒缸挑盡已三更何處歌聲惱客情殘月紙窗眠不穩
照人離恨太分明

濟寧月夜

丹楓兩岸夾長隄，滿目征帆夜不迷。
千里關河同此夜，數聲柔櫓過前溪。

瑯琊女子王夢鸞

夢鸞字仙御，桐鄉人。

偶興

山中古木葉還清，山下漁舟釣晚汀。
夜靜月明人不見，自家歌與自家聽。

姑蘇楊柳枝詞二首

家住橫塘春復秋
門前楊柳數株柔
畫欄長是周遭護
不遣行人繫紫騮

柳條風靜雨初收
更罷羅衣嬾上樓
花下欲將新月拜
一鈎恰到綠梢頭

瑯琊小女

王夢鸞之妹小字仙駕

姑蘇楊柳枝詞二首

絲絲低冑石欄干
擬向階前折取看
臨舉玉纖猶障袖

吹花風起覺添寒

交枝楊柳映重門樹色濛濛帶雨痕繡幙不開人欲倦
只疑深閣易黃昏

姥峰鸚鵡女陸言

予婦陸孺人閣學雅坪公長女也年十七歸予連
遭先父母喪承敬執勞靡有倦節繼以羣侮交作
孤苦煢煢予唯佔畢下帷孺人亦有卧薪嘗膽之
槩焉迨生齒日繁家道中落予復奮策入都朋遊

日盛孺人縮食減衣而勿傷大體以是得不困其
訓子女慈而能整御婢僕肅而有恩鏤剪針織罔
勿精工稍嫻文墨以非婦道之常偶吟而已乙亥
十一月病作自言必死凡家事手撥口囑無一遺
失危坐而逝若有道者先是癸酉予宿天姥峰下
夢一姬曰汝前身白鶴童子汝婦則綠鸚仙也遂
占一詩曰偕隱何年志頗同前身忘却俗緣中夜
來天姥渾猜著是綠鸚仙白鶴童因名言字鸚仙

云

夜遊虎丘

賞心一片石秉燭我來遊月黑松無影苔青露欲流
斷雲新石斷飛錫舊泉留柳色將舒翠帆開憶虎丘

哭鹿女

握珠入海杳難尋痛極渾如萬鏃侵覆翼六年成曉露
埋香一夢委秋衾風翻落葉依新冢月照歸鴉認舊林
追憶膝前歡笑處兩行血淚濕羅襟

京邸傷母新厝東湖別墅

年來顧影暗傷神
花月難留去住身
痛我先凋萱樹早
怕人細誦蓼莪頻
望雲何盡天涯路
戲綵難娛泉下親
佳節每逢垂血淚
因風遙灑弄珠津

咏丁香

小院沉沉欲暮天
閒堦獨步影娟娟
驚看密葉添青色
却愛繁花吐紫烟
拂檻叢叢疑線綰
映簾軟軟借絲纏
愁心欲訴花先結
可惜重來二十年

秋日遊金鰲玉蟬

九鈴殿宇倚青霄
碧樹紅亭白玉橋
我欲一帆歸去也
御河波靜不通潮

攜李詩繫卷三十五

欽定四庫全書

樵李詩繫卷三十六

平湖沈季友編

宋

吳山道人

括異志曰三山曾先生陟嘗寓館於海鹽陳氏七
載有道人自吳山來謂曰子思鄉之切何不暫歸
乃剪紙為馬令合眼上馬以水嚙之其疾如風囑

金瓶梅詞話卷三十一
三十一
曰汝歸不可久留湏臾到家門戶如舊妻令入浴
易新衣陟曰我便去妻曰纔歸便去何不念父母
妻子乎陟便上馬而行所騎馬足折驚寤乃自在
書館中隨身衣服皆新製者道人亦不見惟留一
藥籃中有詩云

一騎如龍送客歸銀髻綠耳步相隨佳人未許輕離別
不是仙翁豈得知

柳姓女鬼

志曰熙寧丙辰秀州嘉興令陶彖子遇一女偕行
至水濱遺以一詩與之期曰仲冬二七月盈之夕
車馬來迎自是令子遘異疾不可救療後辨才法
師元淨抵秀令亟告之法師過令所除地為壇設
觀音像取楊柳灑水呪之夜遂安寢明日始來結
跏趺坐引免問曰汝居何地而來至此答曰會稽
之東卞山之陽是我之宅古木蒼蒼師問其姓荅
曰吳王山上無人處幾度臨風學舞腰師曰柳姓

也乃輟然而笑師又為宣說楞嚴神咒痛自悔恨
母為物邪所轉于是號泣謂令子曰久與子遊不
能遽舍願觴為別因相對引滿又作一詩而去遂
不復見按此係秦少游所載而詩話總龜亦紀其
事與此稍異

生為木卯人死作幽獨鬼泉門長夜開衾幃待君至
別詩

仲冬二七是良時江上無緣與子期今日臨歧一杯酒

共君千里遠相離

曹刺史女

嘉熙間鄧州人金鶴雲以琴書寓嘉興招提寺側
富家夜聞女子唱歌歌罷排戶入與雲會臨別以
金贈之女子潜然曰妾曹刺史女也已得仙術但
凡心未除遭此降謫君前程甚遠夾山之會其慎
之金後為縣令卒於峽州考其寺即曹珪宅後鑿
土得石匣古琴有金繫焉歌曰

記得一曲直千金如今寂寞古牆陰秋風衰艸白雲深
斷橋流水何處尋

張總管

建炎間崇德有張子修字德夫官為浙東總管葺
園于玉灣之北醉花載月築流杯遂初二亭開乳
鴨池為流觴之飲人稱東園時又有邑人張汝昌
字士隆官廸功郎與子脩品望相埒徙居其西稱
西園並饒林館之勝結社賦詩子修卒年八十六

其詩不傳後石門里有召仙者降箕云我張子
修也昔與汝昌築東西二園今日歸來惟見衰艸
宛然一丁令威耳乃題一詩而去

謝事歸來一幅巾千年華表漫哀吟而今廢沼空留恨
好句枇杷更屬人

元

獨樂園主

輟耕錄云友人攜李郭元凱舜舉嘗召一仙至大

書曰獨樂園主也衆以咏史請為作長篇觀其詩
意蓋宋人也

三皇之前不可傳堯舜垂衣化自然夏衰商敗兵草起
征討有罪非傳賢蒼姬種德極深厚厯載八百何綿綿
孔丘孟軻不得位惟有文字登書編春秋筆削嚴一字
誅惡褒善持大權丘明作傳詳本末下迨戰國何茫然
秦皇并吞六王畢始廢封建迷井田功高自謂傳萬世
仁義不施徒託仙東遊弗返祖龍死赤靈火德明中天

漢朝文景稱至治刑措可比成康前無端雜用黃老術
是以未得稱其全王莽賊臣篡漢祚賴有光武如周宣
靈臺名將應列宿婉婉長策扶戎軒絕勝高祖醢彭越
可比周召終天年崇儒往謁曲阜廟典章燦燦羅星躔
後人不省創業苦寵任閹宦皆貂蟬西園鬻爵誠可耻
黨錮忠士災何延一朝曹氏帝稱魏銅駝荆棘生荒烟
關張早死後主弱典午自帝開坤埏五季雲擾亂中國
五馬南渡何翩翩六朝興廢有得失豈知合并歸楊堅

瓊花城裏建宮闕汴湖春水浮龍船亂離思治否復泰
唐室高祖催飛騫秦王神武不可及遂承天祚傳高玄
大綱不正有慙色我嘗撫卷思其淵紛紛女禍握神器
擾擾藩鎮橫戈鋌乘輿避亂數奔竄翠華幾度遊西川
黃巢殘賊不忍說白骨山積血成泉侵凌漸使唐祚絕
江海雖大猶涓涓朱溫降將乃一賊僭號暫時得復失
後唐石晉暨知遠但以功利不尚德周家亦僭登天基
獨有世宗明治術我朝列聖皆深仁天下蒼生得蘇息

史書浩浩充屋棟人主欲觀寧遍及小臣纂集作通鑑
治亂興亡明似日願言乙夜細垂觀比美成王戒無逸

月夜異人

魏塘元萬戶陳景純名當字愛山闢園有異人月

夜叩門題詩云

戊子年間多快樂丙申之歲少留連公公莫作綿綿計

花圃終須變野田

明

天民

嘉靖間浙省平湖縣鄉中有一仙禱事有驗鄉人
遂為立祠亦能作詩寫字欲求其作者不拘多少
置卷於廟過日則墨遍還之也自稱為洞賓號天
民嘗有贈老年得子者詩

爭羨孤梅得遇春
煖風殘雪越精神
西湖昨夜多奇瑞
點破紅蕖已十分

蓬萊宮人

隆慶時嘉興府治東石獅巷有朱生者一日道經
南城遇雨迷路心正驚疑忽有二女童曰奉主母
命來迎朱與偕行入一洞門遙望殿陛璫瓏兩度
石橋乃抵其處一仙娥自稱蓬萊宮人邀君一了
夙願與朱促席暢飲逮晨朱辭歸娥愀然乃設宴
正殿鋪陳飲饌較昨愈奇出一錦軸寫詩以贈揮
淚而別既別朱忽墮山下若夢焉軸猶在手後事
覺軸亦失去見名媛詩緯

三山窈窕許飛瓊伴我來經幾萬程好與清華公子會
不妨玄露漫相傾

壺天移傍郡城壕雲自飛揚鶴自巢千載偶諧塵世願
碧桃花下共吹簫

海外三山十二樓弱流環遶不通舟此身也解為雲雨
迢遞驂鸞橋李遊

莫道仙凡各一方須知張碩遇蘭香春風嘗戀人間樂
底事無心問海棠

百雉斜連一道開為君翻作雨雲臺高情彷彿襄王事
宋玉如何不賦來

湖柳青青花滿枝可憐分手艷陽時離官漫自添離思
瞞得封姨不我知

陽臺後會已無期眉上春雲不自知那更靈官傳曉令
含情騎鵲強題詩

驅山縮地迥塵寰從此交情事不關他日離愁何處慰
暫將三塔作三山

仙女

隆慶初朱生少溪名堯封平湖人居郡城聚徒於
隱真觀忽一日有偏髻女子招生出東門不數里
天且就暝又一女子持燈而待引入林麓間金碧
瑩然異香滿室須臾麗人出拜設賓筵非人間常
品終席無一褻語諄諄多古今典故生亦不甚解
唯唯而已食畢延入書室縱觀典籍圖繪翰墨珍
玩畢就寢宛然世間男女叩其所自俛而不荅口

誦一律有偷閒別却諸仙侶好向人間了夙緣之
句因囑曰吾與君有夙契故輕就君君密之亡洩
也生後稍露其意家人遂謹守之俾不得去女子
亦三日不至已而復來生隨之行則道路崎嶇雷
雨交作女子曰為君洩此機罰君度七里岡也既
達麗人怒曰薄行子何來吾以心托子子何負我
耶使女子送歸及抵家則星月朗然視其衣履又
未嘗濕也一日麗人忽至生若巫覡然口誦其言

曰君何負德乃爾因長吟一絕曰恨滿塵寰不久
留雲軒獨馭上瀛洲憐君一點塵心在誓海盟山
不到頭問其居曰天高地迥海濶江深山明水秀
是我蝸邨問其名曰草野相逢降玉臺來時有念
下天台山人一宿因緣絕解下安冠淚滿腮他如
芝種丹田消白日汞燒金鼎度清秋長嘯一聲天
地老三千甲子半枰棋之句頗為士林所稱當時
聽者為致真假之辨復吟一絕云云且曰仙凡路

隔郎君自愛我從此逝矣時兒童六七歲以下有
見其絳衣霓裳在雲端拱揖者後亦竟無他異出
海鹽崔嘉祥鳴吾紀事此與前事相類疑即一人
也

我是雲丘散誕人半生三見海揚塵今來寄語夸毗子
何必勞勞問假真

木人

紫桃軒雜綴云甘復生來往江湖攜一木偶長尺

有咫尺出入袖中登几案跳躍趨步發聲與人談論
亦能詩自云姓高名梅金溪人少有逸韻二十餘
而卒為煉鬼者刻樟木誦秘咒攝附靈魂遂偕甘
生以遊向客友人屠用明所一日有以詩僧秋潭
年臘為問者朗吟一詩贈之句意清絕非凡鬼也
高僧如瘦鶴懶得著袈裟雪案堆莊子花函出內家問
方醫病竹郵水泛新茶一識沉香氣青烟吐白紗

女仙四人

名媛詩緯載仙女下降秀水謝彩家異香飄拂從
鶴背而下有湘君衣綠玉城仙史衣紅茗上君衣
白少室靈妃衣紫等仙後六年又降謝彩之夫華
亭丁六郎也王端淑曰讀十二美人書內丁謝駕
鶴冲舉盖崇禎以前事也秋濤子言之鑿鑿定非
說夢其歌亦典雅莊重無鄙俗字句烟火人恐不
能道

湘君

絕句

吳水迢遙接楚雲
瑤臺清露滴黃昏
當時誰向蒼梧望
休信斑斑竹上痕

玉城仙史

贈丁生

求厥道初端
俛莫測杳冥冥
以誠為宅玄之又玄呼
吸之間不矯不疾無倚無偏變化反覆元牝之谷以實
為虛靜而匪獨戒之慎之必爾玉燭

茗上君

玉如意擊案歌

吞吐日月兮啜其英浩氣磅礴兮得長生糠粃濁世兮
高躡乎太清雖天上之無愁兮羨人間之有情溯清風
于子夜樂故人之瑟琴白鶴舞兮丹鳳鳴會看迎子之
馭而徜徉乎瑤京

少室靈妃

揚袂起舞歌

悠悠浩劫兮逐逝波茫茫大地兮崇者山而卑者阿何
人世之迷昧兮驚于名利而紛拏豈知太清之上更有
神凝炁謐超世乎塵劫之外終乾坤而不磨只俄頃兮
可以遍遊於九有笑塵世之百齡兮僅刹那子不見夫
樵者觀奕兮爛其柯是知清虛之理莫測神仙之樂居
多抽子之佩慨且歌于焉不醉兮如此良夜何

降道人

崇禎辛巳道人題探梅六言詩人莫會意王翊曰

道人起句謂舟輕則速十里之行等五里雪霽而
殘一山所積止半山耳卽書王子可與言詩

探梅

輕舟十里五里殘雪一山半山我意探梅獨往誰教放
鶴先還

攜李詩繫卷三十六